

序

首修序言

道清撰

序

杨科明撰

贺博罗族谱重修

杨远忠

同治二年癸亥應甲公陳坑三徑紀

按譜宗旺公諱柳始移長樂縣散坑錫坑坪嶺等處居住至元公分居陳坑寨祖祠尚在及邦顯公住下寨又以祖堂作支祠生忠信厚三公予于道光八年戊子隨標叔鼎叔崇兄回梓朝祖細查信公支下并無一人居此厚公亦然惟忠公子孫柏光永興等與上寨族門秀承秀林等作主指示墳塋田畝屋宇隨擇日豎信公墳碑各墓各祠均已祭醮獨春高叔所佃之田七十年租谷未完退耕另批并各佃戶駁換賃約屋地基批與柏光兄并園土池塘在內起造每年交租錢壹百文幫完糧餉立借字一紙外收歸李仁皆兄弟代買祭田文契一紙當立附托約二紙一附陳坑忠公子孫并上寨族門柏光永興秀承秀林收租谷三擔每歲清明日除谷一擔作祭掃存谷二擔一附錫坪李歲彩公子孫秀深蘭標長運千士收租谷六石四斗每年八月初一日除谷三石作祭掃存谷三石四斗其二姓存留之谷日后回梓收作用費有本無利陳坑事畢就此下博羅縣三徑墟數日始到但三徑之事祖上無人道論不惟其詳不可得而聞即路途亦不得而知焉至三徑墟訪得南門洞職員楊大程之子監生兆崑及亞羅大海永珍亞盲等詢其祖代不知來歷問及族譜稱嘉慶壬戌年被陳姓地匪騷擾文契各約放火焚燒得一敬祖請神書方知翰叙公子孫次日自辦牲醴同詣白石嶺祭掃張妙仙祖母墳碑確據嶺下即板橋鋪大坪一支墳塋甚多翰儒公葬此惜無碑志玉石不分回轉至芒頭窩挂張祖妣亦幸有碑墳后上即三巡寨腦可盛公葬此四處無墳只見茅

山內有一小堆系艮山坤向與譜上山向相同至將羅圍挖深成一大堆祭醮而歸臨行時取花錢一元交
崑手授伊祠內生利每年將利錢買香燭代掃墓但祖上移徙博羅縣疑是翰儒公兄弟携母張氏至此及
毓芳公兄弟携母邱曾二妣復回陳坑所以張祖妣儒公夫婦可盛公均葬博羅縣任春公來瀏只帶邱曾
二祖妣毓芳公夫婦骸骨葬瀏陽日后房戶有孝子慈孫此二處勿畏千里之遙跋涉之苦十年一回有何
不可此紀

宋淳熙戊申廣文文富公撰序

當因趨庭之暇佩學禮之訓而有於禮之言曰萬物本夫天人本乎祖人之興物莫非天之所生古之聖賢所謂物以天言人以祖言何也蓋天者物之天而祖者又人之天物不本乎天則自形自色於宇宙之間者孰爲之總掇人不本乎祖則以嗣以續於世代之遠者孰爲之根本日月之照臨風雨之鼓潤而根荄茅甲得以遂其生者此物之所以同乎一天也開之於前垂之於后而高曾雲礽有以久其遠者此人之所以同夫一祖也是則人之有祖即物之有天也藉祖宗之澤而無報本之心是忘其祖即所以忘其天也人而忘夫天尚何容於覆載之間哉噫是祖也乃人之所由本也然有所生之本又有所利之本興之于前傳之於后至於生生而不窮者此所生之本也置乎田園貽以基業至於利利而不竭者此所利之本也凡厥有生孰不同有所生之本哉夫既有所生復有所利是則人皆一本而我則二本矣今石族享祖宗分授之田荷祖宗蒸嘗之利者得非所謂本乎祖之中而復有產業之本哉且閭巷小民鄉落農夫無立錫可資而人心天理未嘗不猶存拳拳於春秋祭祀之日吁彼不忘所生之本也而念祖之誠且若是殷也已承祖宗積累之本又有祖宗產業以爲憑藉之本俾昌俾熾得所本於立業肇迹之余而不饑不寒又得本於仰事俯畜之際而報本之心宜何如哉我楊氏始自宏農分出於虢邑徙於吉州迂於興國上世祖宗墳塋山川間阻不得掃挂惟唐始祖朝議大夫雲岫公官粵寓梅遂立家焉生三子長思孝次思恭三思聰分爲三房

厥后弈葉相承又分爲六房而始祖則六房共之然三房所輸之蒸嘗則有西洋陸擔陸斗酒米之田六房所輸之蒸嘗則有鄭均灘頭一千余秤之稅以西洋爲蒸嘗所祀者百祖罔五龍罔此則三年一收而吾之三房各有與焉鄭均灘頭爲蒸嘗所祀者灘頭合葬之曾祖參軍公黃氏夫人也此則六年一收而六房各與其一焉使后之孝子順孫念祖宗肇造之報難無負前人責望之美意收其租稅祀其墳塋食其蒸嘗追其忌諱由長及幼已終復始難萬世不能變也夫何子孫弗念厥紹任己私意壞昔良規爲一時便急計利之謀而不思祖宗貽厥孫謀之道以陸擔余米爲大寡每年諸房所收僅獲升斗之利故蒸嘗之典因所得之鮮而不舉固可責也若鄭均灘頭一千余秤之稅爲大多陸房糾集則其勢不得以祀親今則吾族之衆昭穆尊卑莫不皆有一定之序矣自今已往務宜各協親愛之情明宗族之義收其租稅祀其墳塋毋得以大凌小以尊欺卑患難則相恤緩急則相通味百世不迂之言而服膺乎蘇公族譜之訓使孝弟之風藹然如春風和氣之可掬豈不美歟

十三世孫恩進士文富謹記

公元二零二五年乙巳仲春 重刊

明永樂丁酉晉江令宗信公撰序

嘗謂參天之木必有其根懷山之水必有其源人之有祖亦猶是焉昔吾族之居梅也由宋迄今世濟其美稱著姓焉宋末族繁星散東西幸賴我祖參軍公至高祖如穆公曾祖斌孫公祖清軒公伯父樹齋省齋震齋祖興房房子係日加繁衍舊業亦頗增益而耕自足者是皆祖宗余慶之所暨也豈敢忘其所自哉吁天運一氣以育萬物故生生而不窮人原一祖以分九族故繩繩而永久何今之人族譜不修蒸嘗不舉或遺其宗緒者多矣士生百世之下欲推其所來而親睦其宗族概不悉由不過自養自育而族之孝弟雍睦名分親疏之類茫然不知嗟哉烏俯而啄獸走而娛猶且徘徊顧群尚恐外物之害可以人而不如禽獸乎是以慨然以祖宗親族爲念上自高曾以下類編成圖貽我后裔以寓羹牆之思焉俾吾后之若子若孫序親疏別長幼披斯圖按斯記究高曾以上之遠親知根乎一氣極祖父以來之遠族知本乎一源使奉先之心油然而生則孝弟雍睦忠厚惻怛之念庶幾由此而興矣斯則信所切望也謹言以爲記